

10 SEP 2001

Syed Hamid-Mahathir

LAWATAN PM KE RUSSIA BUKAN UNTUK BERES URUSJANJI -- SYED HAMID

RAWANG, 10 Sept (Bernama) -- Lawatan Perdana Menteri Datuk Seri Dr Mahathir Mohamad ke Russia selama empat hari bermula Rabu ini, adalah lawatan rasmi bagi membaharui hubungan dengan negara itu, bukan untuk menyelesaikan apa-apa urusan, kata Menteri Luar Datuk Seri Syed Hamid Albar.

"Tidak ada niat untuk pergi ke sana bagi menyelesaikan apa-apa urusan pembelian, pengambilan atau pemerolehan, itu bukan tujuan lawatan itu," kata beliau kepada pemberita hari ini.

Beliau berkata demikian ketika ditanya sama ada Perdana Menteri bercadang untuk menyelesaikan urusan bagi pembelian jet pejuang buatan Russia Sukhoi Su-30 semasa di Moscow.

Katanya lawatan itu akan memberi kesempatan kepada Dr Mahathir untuk membaharui hubungan dua hala dengan Russia dan hubungan persahabatannya dengan Presiden Russia Vladimir Putin. Pertemuan mereka yang lepas ialah semasa Forum Kerjasama Ekonomi Asia Pasifik (Apec) di Brunei tahun lalu.

Syed Hamid berkata di samping memberi kesempatan untuk bertukar-tukar pendapat, lawatan itu juga akan membolehkan Dr Mahathir melihat dari dekat kemajuan teknologi di negara itu terutama dalam bio-teknologi dan aeroangkasa.

Dr Mahathir dijadualkan melawat Pusat Bio-Tech dan Pusat Meteorologi Russi serta menyaksikan demonstrasi jet pejuang SU30.

Mengenai pemerolehan jet pejuang Russia itu, Syed Hamid berkata belum ada keputusan dibuat, dan ia masih lagi di peringkat kajian.

Rancangan untuk membeli pesawat itu dilaporkan telah ditangguhkan ekoran krisis kewangan Asia pada 1997.

Syed Hamid juga berkata, semasa singgah di London pada Rabu ini, Perdana Menteri akan menemui pelajar Malaysia di kediaman Pesuruhjaya Tinggi Malaysia sebelum mengunjungi Perdana Menteri Britain Tony Blair.

Selepas melawat Russia, Dr Mahathir akan melawat Jerman selama tiga hari dari 18-20 Sept atas jemputan Canselor Jerman Gerhard Schroeder.

Semasa lawatan itu beliau antara lain akan merasmikan pembukaan bangunan Canseri kedutaan Malaysia di Berlin, kata Syed Hamid.

-- BERNAMA

HK AHH NMO